

明
詩
紀
事

明詩紀事

貴陽陳田輯

庚籤

孫鎮十四首

鎮字甯之掖人

濤音集王西樵曰甯之擬古樂府得其聲情自是絕
技五古秀挺七言歌行跌宕有氣王貽上曰甯之五
言頗學漢魏三謝然自是盛唐佳境時有桀驁之氣
浮動眉宇七言放歌雜之杜陵幾難復辨至擬古樂
府等作古嶮與衍斑駁陸離直與北地抗衡惜其長
轡未騁而芳蘭早凋令天假之年吾未測其所至也
田按于麟擬古樂府為世口實自後齊人如于無垢
公孝與皆有緒論以于麟好古釣奇不能自為一詞
至譏為探赜膝篋之間乃藝林之根蠹學人之路阱
甯之生後于麟乃能為古樂府古直蒼涼自以為今
人作古語終不似斯其所以為似也近體摹倣少陵
時有奇句選家錄明詩無有知甯之者王西樵教授

萊州編濤音集乃取甯之詩而論次之世無西樵如甯之者亦埋沒於荒煙蔓草而已

隴頭水

隴頭水一南一北流連四下五步一歎息十步一徘徊嗟我
行人心胡以南身胡以北當風激波淚下纍纍酌彼隴水山
上傾澆之使爾南不得南北不得北請與諸君鼓隴胡我心
我身兩分徂上方依希主知之

擬古善哉行

七解

驚風飄日奄忽沈山徘徊四顧壯士摧顏我懷殷憂悽愴無
歡俯視流涕泗沈瀾解昭昭明月陰雲四起晦跡窮山採
歌芳芷寶鼎中燔奇服外緇芳香暗投誰復知矣解鼓鐘嘈
嘈不如雅彈酌醪烹炙尚思綺紉金碧綵錯志在麻菅澹泊

自然可以忘餐

解三

世態反復悠悠莫測我伊有懷夜不能息

引領關河慙無羽翮吐氣慷慨懼爲人識

解四

地迴天高安有

通津蹉跎久別特達無因積怨成疏緣困含辛可當奈何委

望慈仁

解五

基壘惟傾寵極無恩古有忠誠鮮復得完瓦礫見

收而棄與播仰望參商悲何可言

解六

夙駕焉薄于遊于盤六

龍飛輿出入雲端俯觀下都憂心惓惓元膏玉液徒勞苦艱

解七

田橫島

賢豪無近圖列俠羞人下所輸隆準公逐鹿先得者豈惟齊
田橫不能保宗社其徒五百人安不逃之野王侯如浮梗身
世等飄瓦仗劍盡從之血流海波赭漢庭何輝煌如此高義

算萬古懷英聲臨風淚堪把

幸臺

晚登古臺上北風何蕭蕭海空蜃樓滅天廣蓬山遙漢武昔
愛仙巡遊此招要稅駕當利城山川莽來朝行幄豈不華勢
欲凌雲霄安期不可待龍顏亦已凋霓旌變浮煙笳鼓散鳴
潮地古池館盡年深碑版消如何千載下雄名喪輕颺龍去
不再還烏鵲夜寥寥惟有舊時月依然滿山椒

大珠石室

巍巍大珠山其高逼星斗衝擊聞波潮豁爽見陵阜白日落
海上青天挂峯首劃然古石室元冥何代剖時時雲霞出夜
夜風雷走古來棲真仙藥室留石曰如何綉屨纓不見長年

與我欲棄家遊不知終得否

出香山寺登南嶺下大澗晚投碧雲寺作

策杖躡南嶺表裏望幾旬愛此山川佳行歌不知倦雖無絲
竹陳頗有魚鳥翫積翠來遠峯白雲下長澗偃卧春草間好
風時微扇出谷天地開轉徑松蘿換煙深鳥雀集山暝牛羊
散返照竟千里都城如白練的的桃李明爛爛襟袖變返策
投珠林鐘聲入雲漢趺坐對菩提恍如登彼岸

行役二首

朝發任邱城夕過淇水渡落照下遠空長楊夾廣路水流日
不返人去亦不顧長歎問僕夫蒼茫古隄暮纍纍一古塚云
是扁鵲墓歲久荆棘生野荒狐兔聚悲風自天來搖落西郭

樹日行雨舍餘動我千百慮何當解天刑游仙謝巾屐
薄海多曠野晚入燕城臺冥冥孤館閉颯颯寒風來停車謝
候人獨坐心徘徊瓦燈照素壁蟋蟀吟空階命僕沽市醪一
酌心懷開醉來藉草卧倏忽雞聲催悠悠出郊郭四望何悲
哉平原人迹稀惟見蒿與萊況復年歲饑千里但黃埃苦樂
大地偏民生信可哀

曉起簡伯韶

醉眠簟光曙緇衣試展長嘯振松風地偏欣迹散依林坐
理髮還向清冷盟淵淨華藻生山明白雲捲嚶嚶好鳥鳴垂
垂露珠泣危峯落匡床殘花覆苔蘚念子澹蕩人獨居誰爲
遣淨世無長生何爲不遊行載酒攜素琴經過病堪免

徐爾行自青州來視余病病且已館底意山房旬月迫
欲歸作歌贈之

去年冬走長安城長安飛雪燕山平王侯見士如見鬼黃金
爲寶文章輕歸來閉戶渴欲死林間病骨相支撐徐耶驅馬
青州道高談七發雄風生病夫起坐感離別寒暄數語形神
清我悟浮生破千古虛名恥與時人爭徐耶持杯勸我酒醉
我不覺參斗橫殘月入城衙柳色白雲出岫和鐘聲斗水不
足活長鯨閒情可結沙鷗盟徐耶不住欲何往世態乾坤兩
骭髀君年四十老書生我今多病頭顱長遠離重逢知得否
況乎死生如返掌臨歧強飲數百杯眼看落日沈高臺揮鞭
一語不能出海邊雁斷天風來

宿樊桐以早春遣興詩見示漫賦答之

生理何聊賴淒其一病身石橋煙報柳山路鳥哢春琴酒多
妨俗詩書卻誤人莫言名利事一醉落烏巾

羣盜

殺氣生羣盜妖氛失漢旌黃巾橫四野白日閉孤城守吏無
人色蒼生有哭聲恐煩東郡顧垂望正含情

秋懷

黃金臺畔草蕭蕭碣石宮煙鎖寂寥市駿代非遺骨盡談天
名在古人遙平沙落月迷寒雁荒塞征蓬走夕飈今日悲歌
徒感慨英靈千載不堪招

乾光殿

西苑

漢家西苑接朝陽飛閣天開倒日光十丈珠簾垂錦繡千年
鐵檜老風霜彤庭夜月懸鵲鵲紫閣晴雲遶鳳凰誰道御容
深不見鶯花猶得近君王

陸弼六首

弼字無從江都人有正始堂集

四友齋叢說余見扇頭詩有云匣有魚腸堪借客世
無狗監莫論才余極愛之以為近代之詩亦難得如
此者後題名曰陸君弼後訪陸乃江都人歐崙山弟
子也

盛明百家詩陸客詩瀟灑精爽

列朝詩集無從老為學官弟子自髫髻至老治博士

家言伊吾與吟哦併日分夜不少廢又好博涉多所

撰述廣陵為南北孔道結納賢豪長者其聲藉甚趙

蘭銘當事議修正史請徵故知縣王一鳴故通判魏

學禮太學生王穉登生員陸弼入史館纂修未上而

罷年七十餘乃卒無從稱詩起嘉靖末年推尊王弼

州幾欲鑄金頂禮弼州敘平生文字四十餘人願不

及無從久之海內爭排擊王李無從亦心動悔其少
作而迄不能改也王承甫評正始堂集曰戊辰以後
多染時調乙未以後乃爲陸無從詩人謂承甫前評
爲確而後評未必允也
田按無從才調翩翩俊語疊出雖染指弇州尙不至
如牧齋所譏

立秋前一夕夏玄成席上觀吳姬薛素素挾彈戲因賦

長歌贈之

華堂殘暑雨失驕輕颺颺颺吹絺袍主人開宴呈百劇鸞簫
羯鼓聲嘈嘈吳姬座上薛靈芸文俠風流迴絕羣酒酣請爲
挾彈戲約束青衫聊一試微纏紅袖袒半襟側度雲鬢引雙
臂侍兒拈丸著髮端迴身中之丸并墜言遲更疾恰應手欲
發復停偏有致五步之內態橫生曲折回旋皆可意珠抵金
投未足憐檐鶯慕燕鶯相避須臾收繳立徘徊月上雕軒客

未回絲停竹罷催紅燭更將談詭送行杯蘭溪胡生爲我友
百藝稱卿不容口獨傳彈射妙當年相逢卻在燕臺邊將軍
曾鑄黃金埒薛時爲李征蠻所壁細馬輕弧態轉便長安道上多游俠
若箇經過不住羈此時爲賦春江曲寫徧卿家小樣箋

桐江舟中逢吳明府

春水浙西船相逢意氣憐白雲談塵外芳草鬢絲前地是桐
君隱官同茂宰賢姓名堪自愛莫藉眾人傳

禪智寺送月上人歸黃山

長蘆初問法歸去暢立宗一稱空山裏孤雲何處逢寒潭獨
夜月秋雨舊房松回首茱萸路相思隔暮鐘

秋日懷龐學博

蕭蕭一徑入秋苔
束帶時愁長吏催
旅食又看鴻雁至
家書常共荔枝來
花邊小几聽禽坐
竹裏孤琴候客開
千載賦成傷不遇
白頭誰惜董生才

贈吳姬薛素素

纓絕鈿遺漏欲分
留髡送客意何勤
酒闌明月生瓊樹
坐久流螢點繡裙
子夜歌來猶是夏
巫山夢去總爲雲
羞將錦字傳哀怨
清磬長依貝葉文

贈金陵馬姬

杏花屋角響春鳩
沈水香殘懶下樓
翦得石榴新樣子
不教人見玉雙鉤

鄭琰四首

琰字翰卿閩人有一陬詩稿

西樓集翰卿塞上諸稿音訓道衡在王維李頎雁行
徐燭格陰詩話鄭翰卿工七言少遊邊疆集中多悲
壯語如馬邑吹笳烽子急雁門獵火健兒歸霜色欲
將關樹折河聲如帶戍樓奔砂磧到天歸馬小朔雲
連海遠鴻低劍戟已銷兵後火燭燭猶泣戰時瘡積
上陰雲連塞黑關前落日帶沙黃亂山獨馬嘶殘月
遠磧離鴻叫曙霜胡騎分營來漢塚蕃河流水到秦
川讀之有封狼居胥之志
列朝詩集翰卿豪於布衣任俠遊閩中詞館諸公
爭延致之高文典冊多出其手每閉閣不聽出翰卿
笑曰吾具有鬚眉安能作三日新婦悒悒悶死遂跳
之金陵新安富人吳生延居幸舍以上客禮之翰卿
醉輒罵主人呼為錢虜吳與其兄構訟疑翰卿泄其
陰事文致捕置京兆獄竟死獄中
靜志居詩話翰卿詩名藉甚興致故超七言近體全
得力於唐詩鼓吹者
田按翰卿好作俠斜遊工於言情邊塞之篇尤推豪
唱

哭李大將軍

十萬旌旗染血丹招魂夜夜哭桑乾殘兵來拾中郎印野鳥
飛登上將壇金獸鎖門嚴鼓角石麟窺塚葬衣冠至今唵答
騎胡馬猶是將軍舊戰鞍

汪懋忠七十從軍之燕

千金紫馬百金裝白首窮邊烈士腸一雁正來君又去二毛
雖短劍還長燕臺馬死崩寒日易水魂歸哭夕陽筋力尙堪
三日戰牙旗秋捲塞雲黃

春日卽事

荷葉田田柳葉齊女郎何處唱銅鞮春衣隊遇頻嘶馬社酒
人歸盡闕雞二月杏花三日雨千山杜宇一聲嗁年華逐漸
東風去腸斷虹橋小苑西

春日西湖卽事

蘇小門前柳帶煙，煖沙晴日水如天。
杏廡供作宜春酒，榆莢分爲買笑錢。
垂柳綠遮騎馬路，落花紅襯釣魚船。
杜鵑不解遊人意，催盡韶光又一年。

曹子念一首

子念名昌先以字行，更字以新。太倉人有集十卷。

主衡縵山集以新詩聲格氣韻大抵步趨弇州先生列朝詩集以新王元美錫所謂近體歌行酷似其真者也。爲人倜儻重然諾，有河朔俠士之風。

除夕袁中郎縣齋守歲

江左平疇白浪遙，賃春空寓伯通橋。
蓬門歲計羞藜糝，花縣春情惜柳條。
梳髮鏡中驚易鬢，寄愁天上雪難消。
流光不爲

浮生住挑盡寒燈夜倍迢

裴邦奇

六首

邦奇字庸甫聞喜人有巢雲集八卷

田按庸甫詩語新而調適自是布衣之後

寄題海峯蘭若

聞道幽栖處山房傍水潯
鶴盤青嶂遠僧卧碧蘿深
海月低禪榻天風送梵音
西遊定何日蘆葉渡江心

五日獨酌寫懷

白髮新年長青山舊業貧
旅懷驚節序客計老風塵
草閣偏無暑蒲觴別有春
醉鄉淹日月誰是獨醒人

真寔彩雲洞

洞天何爽塏，溽暑得清涼。雲液傾尊綠，松風拂袖香。花開河朔宴，人醉午橋莊。樓外簫橫玉，翩翩下鳳凰。

雨坐

驅暑開松閣，鉤簾對石屏。凱風吹細雨，長日落空庭。鷗泛沙痕淺，龍歸水氣腥。塵纓都濯盡，逸興寄滄溟。

龍澗峪

踏磴扳蘿深復深，春山無處不登臨。雲盤鳥道青冥上，雨挂虹梁白晝陰。松外石壇留鶴跡，洞中山鬼作龍吟。酒酣欲擬登高賦，萬里風煙壯客心。

過呂岫雲綠井莊

巖居相訪嘯煙霞，草樹遙連石徑斜。綠酒同傾陶令宅，青山

重眺謝公家
牕雲曉拂竿
竹池水秋鳴
兩部蛙便欲
從君歸舊隱
西風垂釣白
鷗沙

聞龍一首

龍字隱鱗邨人有行藥吟幽貞廬詩草

甫上耆舊集隱鱗生有至性五歲喪母哭聲感路人以憶母畢生長齋性愛佳山水以父在所出未嘗踰百里惟遊四明山會過旬日居長卿有言鑑水隱鱗作天際真人想其風格可見也
靜志居詩話隱鱗以孝友德性聞於鄉里初不以韻語自負然其近體頗開整特少警拔耳

訪豐吉甫

兄弟爭高卧
風煙各杜門
綠尊忘歲月
白眼睨乾坤
壁挂魚腸劍
竿挑犢鼻褌
時人未之許
捫蝨與誰論

程可中一首

可中字仲權休甯人有汶上集二十二卷

四庫總目可中詩亦七子末派

過白溝河

白溝河水逝東奔燕馬南來河水渾原草百年殷戰血陰風
半夜鬪遊魂明堂又喜朝元后率土空教哭聖孫回首漫憐
方正學茫茫青史不堪論

葉太叔 三首

太叔字鄭明更名亭立改字介子鄞人有思煙集藏

山稿

甬上耆舊集鄭明五律氣格高澹轉造自然
田按鄭明古詩酷慕長吉刻鵠不成五律清矯不羣
布衣詩之有骨幹者

夜過山陰

夜發山陰棹，翻思舊日經。
雁空聞鏡水，雨自溼蘭亭。
孤燭帆前閣，千峯夢裏青。
客懷牢落甚，顚鬢欲星星。

閒居

身外本無緣，逍遙轉自憐。
養生感逝水，閱世學枯禪。
道以閒能長，名因傲不傳。
何妨居寂寞，遺興有詩篇。

久不出籬門

久不出籬門，唯堪對酒樽。
是非吾自曉，險薄世難論。
老坐青氍毹，貧居白屋尊。
料無能報力，莫易受人恩。

安紹芳 三首

紹芳字茂卿，無錫人。國子監生，有《西林集》二十卷。

田按茂卿家席厚贊聞園池有西林諸勝王弇州記之詩調平適時有清音

月夜社中諸子飲余水閣因誦唐人淮水東邊舊時月

夜深還過女牆來遂用爲韻得時字

六代興亡地千秋絕妙詞與君重對酒懷古有餘思恨逐寒潮盡歡留夜月遲不須商女唱已是斷腸時

舟中望金山

挂席經孤嶼躋攀惜未能塔喧樓嶺鳥窗倚聽潮僧煙濤暮一色樹凋秋幾層旅程應可計遠浦見寒燈

汪子建卓漱父美固孟葉茂長楚僧東明訪余西林分得來字

誅茆聊傍碧山隈一徑松蘿窈窕開溪鳥不驚高客過嶺雲

能伴野僧來煙霞一壑容吾長風雅千秋見爾才擬借清輝
招共隱籃輿無那夕陽催

明詩紀事

貴陽陳田輯

庚錄

瞿汝稷一首

汝稷字元立常熟人侍郎景淳子用蔭補官遷刑部主事歷郎中出爲黃州知府改邵武辰州遷長蘆鹽運使以太僕少卿致仕有罔卿集

四庫總目汝稷集前有葉向高所作墓誌銘稱汝稷最
不喜溫陵李贄以爲得罪名教其識實出明季士大夫上其詩文則未能凌跨流輩也

涌泉庵

雲磴逶迤入松蘿杳靄深一燈燃慧室萬綠覆慈林野鵲馴

僧定寒泉涌梵音可容塵世寄猶繫子牢心

屠本峻一首

本峻字田叔鄞人尙書大山子以蔭授刑部檢校遷太常典簿歷南禮部郎中出爲兩淮運同改福建遷辰州知府有屠田叔詩草

筆精屠田叔詩談云近時崇尚甫解之乎輒使啾啞稍習聲偶邊壽棗梨人靡不握管城以摘詩詩無不巧立晏而爲序詩道崇尚無過今日清風輟響亦無過此時

甬上耆舊集田叔官太常典簿因撰太常典錄記國家郊祀大典時比諸唐王涇郊祀錄宋文彥博大饗明堂記生平喜讀書至老尙手一卷人曰老矣奚自苦田叔曰吾于書似以當食渴以當飲欠仲以當枕席愁寂以當鼓吹未嘗苦也起生曠于甬上撰狀及表自稱曰慈先生一時詞家俱奉爲祭酒

入會稽

會稽稱大郡風壤舊京華綠水潄南鎮高城遠若耶郡中輪
竹箭山上起官衙但恐芳蓀歇扁舟問浣紗

費懋謙一首

懋謙字民益鉛山人以蔭官南都察院都事就遷左

樞參軍

王筍詩談民益以貴公子折節下帷讀書性又喜吟
青溪之社民益實首倡之又捕籌筆軒客星槎淪茗
焚香山人墨客延接無虛日閩有王山人者善寫梅
民益即從作梅金陵陳子野善墨竹民益即從作墨
竹晉江黃孔昭工山水民益即爲山水皆得其意

送朱秉器之渝州太守任

追隨白社六年餘羨爾新詩獨起予遠指雙旌臨錦水先驅
五馬向匡廬江梅試煖離陽劇苑柳迎人執袂初重握春風

更何許涪江魚雁莫教疏

吳稼澄

四首

稼澄字翁晉孝豐人僉都御史維嶽子以蔭除南光祿典簿累遷雲南通判有立蓋副草二十一卷

列朝詩集翁晉弱冠稱詩爲弇州太函所推許長而掉鞅詞壇勃率苦心自漢魏以及三唐無不含咀探擷然而遊汪王之門風聲氣韻多所熏染求其超乘而上則未能也

靜志居詩話翁晉樂府如健兒騎駿馬左右馳突靡不如意近體頗合西崑

礦山謠

礦商聚中野各各不相下珍寶餽中官黃金傀主者淘沙千金得銀百公私費用兩無益詔書來詔書來中官忽變置主者顏色如死灰山頭血出金氣死誰作封章報天子

驄馬

青驄白玉鞭綠草去翩翩夜月隨公子春風逐少年
驕嘶垂柳外顧影落花前何日征驍虜長驅赴朔邊

同溫長卿登金山

江勢搖坤軸江光沒島痕微茫窮四表突兀見孤根
疊嶂連京口驅濤入海門同遊指竒絕落日更開尊

代寄徐仲容

秋雨蘇蘇滴井梧風吹妾夢到東吳生來自恨青溪近
獨處無郎似小姑

田藝衡

一首

藝衡字子秋錢唐人副使汝成子以歲貢爲休甯教

論有田子秋集二十一卷

四庫總目藝衡在嘉隆間猶爲博洽而詩格頗嫌尤漫
列朝詩集于秋十歲從其父過采石賦詩云白玉樓
成招太白青山相對憶青蓮寥寥采石江頭月曾照
仙人宮錦帶

戎政府

大將新開戎政府門外列校如狼虎團營十二坐指揮此生
焉能與噲伍咸宜旗偃虜騎來咸宜旗出虜騎回九廟震驚
本兵死帳中歌舞方行杯寵錫如山印如斗君恩愈深臣愈
負兔窟深藏屠酷兒耽韓屢納單于婦平頭奴子腰盡黃不
獨秦宮花底狂內家珠玉耀權室錦衣目側咸中傷援雛飛
去癰疽潰鴛病疽發時室中有物如白兔白雞會公夏公來
作崇疾革時自言見兩公來西湖一莊不忍捐帶礪山河片
素對昔漢武安侯事

言墜劈棺僂屍鼻九邊嬌妻稚子棗街懸誓書未及傳三策
血食甯知絕九淵鄒塲空爲萬年計落花滿地朱門閉雞鳴
狗吠散如煙寵姬給配功臣第就裏尤誇俞七兒新人重事
尙嬌痴開裝寶束今何許玉帶曾勞妬柳枝七兒姓俞氏家
奴洪定女也爭
繫玉帶圖其嫡洪不與乃自製七寶開裝金束其值蓋巨萬
計云

田按子秋戎政府一篇詠威甯侯伏轡事也詳見余
州將軍行

哀應福一首

應福字華字貴陽人官來鳳知縣有漁磯詩草

黔詩紀畧華字詩亮節清音獨具風格

歸來

歸來無一事花竹伴吟身落日清秋暮荒園叢菊新病憐高

興滅老愛舊書親猶有忘言趣停杯望可人

潘光統 二首

光統字少承廣州順德人以貢入國子監除光祿署丞有茲蘭集

秋望

越王樓閣倚蒼巒別苑離宮草樹殘正朔已非秦日月朝臺猶憶漢衣冠風生禾黍樵歌歇秋入關河夜柝寒間倚青萍時極目不知何處是長安

閨怨

幽人畏人知深閨獨閉時莫令秋月入照見妾空幃

林世吉 一首

世吉字天迪閩人尙書燦子以蔭官戶部郎中有叢
桂堂集二十卷

挽法偉上人

杪秋經古寺一徑掩蒼苔說法人何在參禪客獨來溪雲侵
講席山月暗香臺墮下菩提樹猶傳手自栽

杜開美 三首

開美字袁度上海人用薦除文華殿中書舍人有秋
水遠遊扣舷貂裘潤州白門敝帚行藥堀甲閒居諸
草

訪王延年不遇

端居寡歡棕攬衣出西郭緒風吹我衣水田曠漠漠眷彼中

林士埋照卧邱壑雙扉晝不開白雲抱幽閣獨往不知處青
天騎野鶴

茅山抵家有作

青雀西飛千里行江春兩岸聽嘒嘒拾將瑤草尋仙侶開徧
山花送客程偶去暫違黃浦月歸來仍傍赤烏耕入門把臂
紛相問爲說煙霞裏盈

客舍苦雨

卽看春草綠知長故園穢爲語留晴色征途伴客歸

邱峻一首

峻字惟高桐城人貢生官始興教諭

畫山水

翠滴松梢雨乍收
山光半爲白雲留
江邊可惜無人往
閒卻蘋花一段秋

顧從義 一首

從義字汝和上海人以善書授中書舍人遷大理評事有硯山山人詩稿

田按汝和頗稱好事家有玉泓館摹宋本淳化帖藏之名重於時多藏法書名畫香光稱汝和所藏以顧愷之女史李公麟蒲洲九歌蜀江四卷爲最入本朝先後歸內府爲石渠寶笈著錄

和張長興西園白雲塢

古巖多莓苔修篁潤几席
往來無雜賓白雲自朝夕

趙士亮 二首

士亮字汝寅掖人貢生官東安知縣有龍溪草

濤音集王貽上曰丹澤與孫甯之宿樊桐鼎立一時
秋興塞上諸篇已造境地
田按玩秋興一篇似汝賓鼎革後尙存

蓬萊閣

東望蓬萊近十年思一遊今知滄海大始信九州浮赤日波
中浴青山水上流荒城潮汐苦晝夜打濤頭

秋興

王氣鍾山近有無金陵自古帝王都松杉猶帶前朝色臺殿
時思佩玉趨蒼鼠畫冥翻碧瓦荒苔秋老鎖瑠鈎石城北地
秦淮水想像當年入繡圖

劉繼善一首

繼善字元卿寶應人貢生除鎮江訓導有掩關集二

卷

田按掩關先生爲余友震青侍講國世祖訓導鎮江
砥礪士行力任名教子永澄以名行著世德清門至
今稱之

自賦

白田居士老青瑣四壁蕭蕭別有天舊積圖書消日月新成
詩句媚林泉鴻賓燕侶看來往滄海桑田感變遷荒徑客來
留共醉阮生那惜杖頭錢

明詩紀事

貴陽陳田輯

庚籤

邵正魁 一首

正魁字長孺休甯人國子監生有梁園燕臺二集

玉筍詩談長孺客金陵入青溪社一日訪子官舍會雨雪余遣騎送之因就社中作雪中借馬詩遂爲一時佳侶

贈朱孟震入覲

郡侯不與省郎同倒屣猶存下士風詩自中和稱益部社曾淪落問吳宮時名海內千金重世事尊前一笑空霄漢憐才公等在豈堪結侶五湖東

周才甫 一首

才甫字文美永嘉人有雁川集

玉篇詩談周山人人才甫隆慶辛未入青溪社喜作梅每對客酒間命筆殊可人意又自為詩其上詩才亦秀逸

送王按察四川

憲府開西極分符重地曹帆前春樹遠天上法星高旌旆懸
三峽圖形按六館君才堪賦蜀萬象待揮毫

方問孝 十二首

問孝字晉成歙縣布衣有蒼耳齋集十七卷

田按晉成與周子愿遊于愿集中有與萬伯修書云兩年間凡託兩布衣為郵一為京口章廷綸一為歙州方晉成二君畫法詩為庶幾擅代蓋章以畫名方以詩名也晉成近體閒助雅有唐音

嚴先生祠 二首

于陵恥繁爵所志在山澤長嘯歸富春一竿輕萬石雲來灘
水暗月上苔磯白漢鼎今何之先生有荒宅

漢室榮諫議先生懷隱情不重一時祿但釣千載名山從石
瀨合江至桐廬清悠悠人間世所以稱先生

晚別周丈人

征途謝送者駐馬聞寒鐘落日有離色浮雲無定蹤憂人身
易老夫子道難容明發兩相望秋山深幾重

之秣陵作

擊楫出京口天南望帝鄉江從瓜步闊山入秣陵長落雁下
寒浦遠波吞夕陽濯纓如可適吾道亦滄浪

歲暮都城送方兵憲仰之赴嶺南 二首

闕辭雙鳳下城指五羊東道路還鄉遠山川過嶺雄蓋飛炎
微雨旌捲瘴江風遙識兵威肅天南百寇空

借問征南路迢迢幾月中雲迎漢使節山遠尉佗宮風色旌
旗變軍聲瘴癘空遙傳霜雪少不與帝京同

秋日濟北送修法師還南海

來吳今去魯南國事金仙雨重尋山笠湖高泛海船千峯投
暝寺一鉢乞寒泉後夜青天外虛空處處禪

歲杪留別邊翼卿

朔風燕雁滿汀洲千里鄉心急暝流時序又驚殘臘至山川
不是壯年遊雲平海樹吞淮浦雪暗江天失潤州長劍角巾

東路遠貧歸誰憫黑貂裘

晚次秋浦

蘆葦蕭蕭有雁聲夕陽旅泊最傷情江湖到處飄萍梗身世
無人識姓名三楚風高寒葉落九華雲盡晚天晴誰憐宋玉
悲秋甚一段新愁賦不成

送人謫宦楚中

天南何處動相思暮雨蕭蕭斑竹枝雲夢草生歸雁盡江潭
花落逐臣悲芳洲白芷堪爲佩去國青山好賦詩早晚恩波
還北闕如今不是賈生時

長干行

帆落潯陽口鳴箏試一彈隔船相問訊同是住長干

送春詞

病酒還沽酒傷春復送春君看惜花客不是少年人

梅守箕 五首

守箕字季豹宣城諸生有居諸前後集

弇州山人續稿季豹五言於漢魏時離時合而其合者并其氣度色澤得之
靜志居詩話梅氏一門羣從禹金最負時名嘗後先
過王元美元美贈之詩云從誇荆地人人玉不及梅
家樹樹花季豹爲禹金從父雖譽稍遜然詠懷諸作
恐小阮亦當避席也
別用按季豹古詩氣駿而聲亮視膺古者有上下床之

送王博士返貴陽

車出北門與君爲別離攜手立徘徊涕下忽交頤涕下勉
自匿情至不能辭嬾婉念舊歡契闊成新悲山海萬餘里浮

雲亦難期縱有蕭蕭羽臨風恐退飛願爲阜下塵從君以驅馳

古詩

北風何蕭蕭素雪相與期寒氣時總至歲月忽已違久客在他鄉愁寐中心乖登高望不極誰謂可當歸我歌式微篇涕下沾裳衣

古意

自與君別者日日臨高臺雲天望不極江帆安在哉夜雨和淚積秋風兼愁來寒帷幽夢曉落葉紛相催

清溪館贈詩

耶豔解歌白石曲憫儂故作清溪辭心招暗託調絃思目成

自有將花時能憐繫馬疏柳外長恨嗁鳥高樹枝獨眠無夢
不易且雙笑有情多失期葛根爛漫藕生孔何處對面空相
思

破鏡詩

嫌名驚異獸殘照委空房不復圓光影能窺半面粧初弦臺
上月出匣枕邊霜若問隋朝事猶令人斷腸

豐越人二首

越人字正元鄞人主事坊孫有天放野人集四卷

甫上耆舊集先生嗜學工詩寄情蕭散杜門散髮脩
然於修桐疏竹之下興到輒詩索筆直書破窗頽垣
俱滿客時過從至無從覓巾襪所深知惟沈嘉則楊
伯翼先賓父數先生性不喜交聲上人常見一時山
人行卷輒睡之日詩以道性情豈爲汝輩行乞耶先
生詩有林泉無市朝有懷甲無譽頌有流連無繫慢

盡洗詩家之陋

南峯

石磴盤空翠炎風入座涼
滄溟流日采青壁抱霞光
野樹侵吳密江潮過越長
從來畏登眺霸業幾銷亡

山居

疊嶺分遙海重湖逼太清
地幽無過客春盡有嘯鶯
徑轉垂蘿合雲流大壑平
綠畦風蔓引丹嶂石泉縈
俗朴惟傳姓花繁不辨名
由來山水趣長此事岩耕

欽叔陽 一首

叔陽字遇公吳縣學生入國子監有集

稅官謠

千人奮挺出萬人夾道看軒爾木揭爾竿隨我來殺稅官

靜志居詩話太監孫隆以督緝造駐蘇州朝廷方起稅額惡少年行賄充委官乘輿張蓋勒索商稅民不堪命崑山人葛成率眾二千入分作六隊一人搖旗扇前行後執挺隨之知長洲縣事鄧雲霄見民情洶湧擒委官頭目械於立妙觀眾立毆死裂其尸知府朱熒元勸諭始得解散此萬惡二十九年事也時葛成慷慨就獄後得宥罪又二十餘年而有顏佩章等實先啟其兆云

吳元樂一首

元樂字振之休甯人

山響閣讀畫錄振之善琴工畫筆法古勁不落窠臼每作畫輒操琴一曲然後揮毫

讀劉孝標傳

辨命有深論虛達明主前獨比馮敬通可為識者憐三同誠有之四異有未然思隨秋草沒聲迹永無傳

秦植 一首

植字子培無錫人有清湖前後集

和牧之廣陵遺懷

當年薄倖誤青樓載酒重來悵昔遊二十四橋明月滿斷腸
容易是揚州

秦延勳 一首

延勳字允元無錫人

送人歸梁溪

故山不可卽遠望慰離羣末路誰知已臨歧更送君歸心千
樹雨秋興五湖雲好待東籬下黃花醉夕曛

吳明珍 一首

明珍字季重休甯人

山中作

我本山中人但識山中話五月實松風人間恐無價

吳伯敬

一首

伯敬字長興宣城人貢生有綠潤園集

贈程山人彥之

年少才名洛下聞偶從花外挹清芬遠遊不飲新安水大隱
還依笠澤雲病借青山供起色愁添征雁重離羣卻憐寒氣
侵衣袂縞帶無能一贈君

梅士勸

一首

士勸字勉淑宣城人有唾餘集

柏枧

八年重一到山色尙蒼蒼勝地應停騎佳遊夙裏糧虹梁飛
木杪雲瀑冷崑光昔日題詩處藤蘿幾尺長

王環一首

環字尙玉宣城人有蟪蛄集

嶺南留別豫章夏生文煥

幾年筆硯共炎方忽唱驪歌別五羊葦蕸枝長方接席蒹葭
家在又還鄉離亭曉送鷄聲月客路秋分雁背霜龍劍異時
當合并敢云潮不到潯陽

袁鶴聲一首

鶴聲字汝明宣城人有鵲居集

翠雲菴和陳山人韻

仙剎絕紅塵因君叩白雲石梯緣竹上樵徑入林分地僻人
稀到溪深鹿自羣支公有妙理得向靜中聞

鍾薇一首

薇字面溪松江華亭人

秋日宿塔院

水國氣先涼地深塵鞅絕殘經散不收空庭舞黃葉

馬懋勳一首

懋勳字四錦桐城布衣

山行

過山間犬吠望望有人家遙見翠微裏開門掃落花

馬之瑜 一首

之瑜字君璧桐城人有湖上草堂詩鈔

九日書感

歲事三秋老新悲兩鬢華壯心銷白酒愁眼對黃花海內兵
戈滿江邊賦稅加可堪驚婦子無計守桑麻

錢可久 一首

可久字思畏桐城人

西郭趙園

逆旅經時久芳郊載酒頻常因看花處憶得故園春筍迸籬
根出萍浮水面新灑然逢一笑聊爾任吾真

齊鼎名 一首

鼎名宇重客桐城人按察使之鸞孫有蒨緌集

登嶧山

策杖度崑巒星辰掌上看丹爐黃葉合碧殿白雲寒夏貢孤
桐老秦碑小篆殘振衣凌絕頂選石坐盤桓

姚之邁

一首

之邁字汝碩桐城人有來青集

送友人之粵東文幕

竟上越王樓眞成萬里遊瘴雲隨地起蠻海接天流花放四
時煥文從五嶺收鄉心莫易動酒破鷓鴣愁

朱廷佐

一首

廷佐字南仲吳人徙居金陵有春雨堂集

偕江靈巖登雨花臺小飲

暫快披襟願涼風滿澗阿好山連郭近名士過江多世事屢
遷變吾生惟嘯歌登臺聊騁目不惜醉顏酡

卓發之

一首

發之字左軍瑞安人有漉籬堂集

秦淮竹枝詞

楚歌湘曲未須哀遙見燈船趁月開長笛叫雲簫咽水百千
神女弄珠來

汪宗孝

一首

宗孝字景純新安人

金陵詩徵景純江左大俠憂時慷慨期毀家以紓國
難卜居白門城南築樓六朝古松下好蓄古書畫鼎

月窟分二十
蘇之蘭妻孫靈光善盛別王伯毅稱之以爲今之李清照也

和陳夫人牡丹詩

深葉繁枝底苑牆朱顏贏得配花王風迴關盼筵間態日映

楊妃醉後粧嬌豔由來稱覆錦

唐李進賢有牡丹覆以錦

穠華應許傍沈

香也知春盡饒清賞燒燭相看更斷腸

許經一首

經字令則松江華亭人

田按令則眉公弟子詩多俳體時能作才子語

四印堂夜集觀姬人紫雲歌舞卽席賦贈

錦蠟屏圍淥水聲上元時節遽聞鶯不知杜牧才多少直向當筵問姓名

陸應陽二首

應陽字伯生松江華亭人有鳴雁采薇陸萍香林桃源河上荆門白門武夷五茸笏溪問雪懷舊等集

露書陸伯生作詩首首有鴻雁字章元禮因呼爲陸雁

田按伯生爲申吳門客善書亦自矜其詩沈虎臣痛詆之謂其無一致語然詩亦時有可采

歲暮東歸道中志感

蕭條歲暮獨客返寒塘尚守青瑣舊空令白日忙潮喧孤棹急鵲噪野田荒自歎飛蓬迹羞言志四方

鄭州旅次用壁間陸君策韻

朔風吹落九河陰處處寒衣急暮砧一望薊門黃葉滿始知秋向客中深

明詩紀事

貴陽陳田輯

庚繼

吳應一首

魁字希元歛人有梅臞吟稿

春感

蛙
社信未傳燕子春愁又逐楊花消得幾番風雨草塘處處鳴

吳鎮一首

鎮宇時守歛人有柏崖稿

元日

架上書添新日歷
瓶中梅插舊年花
幽懷一段無人會
雪水爐邊自煮茶

王勣一首

勣字汝嘉南通州貢生

城北樓登望

聘望孤城北
春雲雉堞高
年華新白髮
草色舊青袍
樹接天邊路
山連海上濤
憑闌無限意
落日首重搔

江一山一首

一山字子雲海門人貢生有雙蓮閣集

園居

緩步向林麓
支筇對晚山
片雲心共遠
獨鶴意俱閒
花底清

尊倒風前倦鳥還昨非今覺是已愧鬢毛斑

王醒之 二首

醒之字夢叟南通州人有仙夷草怡雲館集

獐婦

盤頭烏絲雲不理了簪貼鬢蠶生耳短衣褶裙跣足行手把
峒花腰繫藟三三兩兩入城闔賣歌賣笑不畏人侏侏亦解
作華語自言家是納糧民獐婦獐婦花纂纂交州市上春風
緩谿深箐密踏唱歸竹籬閒處即相攜

泊銅陵見月

縣繞千山出銅陵舊有名江聲時鬪岸嵐影欲過城貰酒從
村市逢人問水程離家秋思遠兩見月生明

湯有光

四首

有光字慈明南通州人有慈明集

山茨社詩品慈明詩如西人造神仙酒麴水既備頃刻而成可以供一時之歡笑然味則近市難壓蘭陵之口

田按慈明入范異羽山茨社近體時有警動之作

送黃華父之岷縣

一尊江上別江色引仙槎夜雨錢塘樹春風岷縣花山將官舍繞柳向驛門斜念我耽遊賞相期過若耶

送王少微歸吳

西風吹不斷萬里秋冥冥楚地一尊盡吳天片雨青飄零遊子計江海少微星回首扁舟遠離鴻不可聽

廣陵寒食

邗江江頭拾翠行
薄羅初試東風輕
一百五日寒食過
二十四橋春水平
夾隄新柳綠於酒
何處短簫嬌若鶯
醉歸人向娼家宿
燈火滿街聞賣餠

靈谷寺道中

紫翠逶迤路幾重
青山面面削芙蓉
雲連內苑城邊樹
風送南朝寺裏鐘
御道人過時下馬
孝陵王氣日成龍
一尊到處俱堪醉
回首斜陽隔萬松

葛幼年四首

幼年原名增字士修
南通州人有海居集二卷
浮槎

集一卷行樂集一卷倚劍集二卷

陸弼正始堂集士修詩
環詭跌宕雄視淮以南
一經堂詩話士修游
廣陵時南海歐楨伯主竹西

鹽土修奉之爲師其詩專講聲韻恪守師說斷斷
不失尺寸

復歸江上別業

獻策適不用歸畊猶薄田狂矜吾舌在名讓眾人先野鳥窺
新屋江梅發舊年畫眉原不媿安得使人憐

自青霞館移居北屯草堂卽事

秋色澹然淨蕭蕭清客魂庭閒時度鳥樹老不遮門澤國平
蕪斷殘陽遠水昏不妨蕭瑟甚幸免市囂喧

茱萸灣遲黃使君希尹

湖上落葉盡客行今未歸青楓官舍冷華髮宦情微淮水日
愁望蘼鴻秋不飛浮雲那可問淚滿逐臣衣

江上送客

南去扁舟一葦輕
焦公壇下暮潮生
憑君莫奏楚商曲
楊柳春雲無限情

黎密 一首

密字縝之番禺諸生有縝鳴集

古意

美人北窗下
含情揮素琴
上絃別鶴怨
下絃哀猿吟
一彈再三歎
悲來中輟音
帝子渺何處
瀟湘雲正深

蘇景熙 一首

景熙字汝載廣東順德諸生有桐柏山房稿

空城雀

空城雀何不飛去啄食玉山之禾穗
卻向空城拾螻蟻螻蟻

雖微亦自愛其生可惜城中人闔室屠官兵官兵殺人不殺賊插鼓椎牛縱劫勒

朱完三首

完字季美南海諸生有清暉館稿

廣東詩粹歐子建云季美居粵城北郭之虹岡栽竹數萬竿梅數百株閉門自娛而問字索書者不絕詩清婉有致

山岡漫興三首

繞屋桑田百畝當門松樹千株牆東牆西蝴蝶山北山南鷗鵠

石上風搖薜荔花間雨滑蒼苔新蟬響斷還續暮鳥飛去復來

石上流泉飲鹿雲中茅屋鳴雞幽人策杖何去採藥富荊寺
西

范之默 一首

之默字仲宜寶應諸生有我有軒集

虎邱坐月逢雙梧禪師清話

月滿千人坐登歌欲二更清池搖劍影蒼樹出鐘聲悟石那
成幻開山此得名因君析禪理深自愧浮生

乞菊

半生獨抱陶潛好疏懶全無樹藝功欲向君家乞名品酒杯
詩乞答秋風

鄭爾忠 一首

爾忠字孝初寶應人有淮海西遊書柿齋燒香等集

湖上

西風蓮葉渡秋水蓼花灘終日無塵鞅生涯有釣竿村醪濃
似乳溪蟹大於盤有興聊孤酌陶然詠考槃

廖孔悅

三首

孔悅字傳生上元諸生

田按傳生七絕翩翩逸調

偶集

春雨霏霏酒卮滿堂紅燭對彈棋主人先醉非無意愁見
更聞客散時

訪道士

露草煙林斷客行竹扉晝掩對高城
道人不愛人天供消受
秋空鶴一聲

酒家同彥先

苦說傷春還餞春夜深唳鳥對沾巾
綠陰村酒城南市同是
尊前白髮人

陳鳴鶴三首

鳴鶴字汝翔懷安人有泡菴詩選

東南嶠外詩話汝翔萬厯中諸生案舉子業與謝在杭及徐興公兄弟共攻聲律凡三十年有東越文苑六卷閩中考一卷著錄公所選定也七絕最佳四庫其詩名泡菴集卽與

馬鬼驛

春雨梨花暗馬鬼霓裳聲斷不勝哀
鳥唳劍閣空相憶人去

驪山竟不回驛路幾時迎翠輦佛堂千載閉蒼苔多情惟有
華清月還照宮中歌舞臺

沖祐觀

吸露餐霞絕世氛石壇親見武夷君漢家天子多煙火卻把
乾魚汚白雲

古戰場

連天殺氣壓黃雲鬼哭啾啾亘耐聞日暮亂鴉爭白骨不知
誰是故將軍

陳宏已

二首

宏已字振狂閩人有蘆中馬東諸集

泊黃山驛示王吳二宰

古驛黃山下孤舟綠水涯逢人盡鄉曲獨客似還家

苦竹派

明月沙頭苦竹青鷓鴣嘯罷水冥冥嶺南行客腸休斷不似黃陵廟裏聽

鄧欽文一首

欽文字徵甫江陰人有倚竹紀遊二集

詩數延陵鄧欽文詩素不知名戊辰春余同黎惟敬諸子遊西山歸各賦詩鄧所作一首特精工冠一時

卧佛寺

佛卧何時起空山日月低花從開智慧樹幾長菩提世事浮雲夢吾生待指迷白毫如可卽香象復來西

蕓養斌一首

養斌字叔允國子監生有董叔允詩

送人之咸陽

念君何所適鞍馬向關中驛路三千遠河山百二雄月明秦
廢苑花落漢離宮惜別魂應斷悠悠渭水東

王應岳一首

應岳字重甫侯官布衣

送鄭景愛

淒淒風雪裏之子欲何之惜別一杯酒重逢是幾時霜寒雞
唱斷天遠雁行遲隴上梅堪折憑誰寄所思

許樵一首

樵字巖長莆田布衣

露書嚴長詩酸楚流利雖少含蓄不失爲雍門鼓琴
蘭陔詩話嚴長與同里吳元翰張隆父林希萬黃漢
表盧元禮高彥升陳肩之林彥式諸君結北山詩社

社期阻雨有懷遠遊諸丈

幽期今日到清溪
白社雲深入望迷
驟雨斜風人聚散
青山綠水路東西
三春飛雁書來少
一別平原草又齊
此意蕭條鶯不解
閒關猶自隔林囈

劉黃一首

黃字師藩上元人有檀橋集

舟行至蘭陰

澤國蒼茫景扁舟接遠天
江明潮帶月山暝樹生煙
橘燕時留語沙鷗自在眠
風餐兼水宿旅夢動經年

鄒景賢

一首

景賢字孟淑上元貢生

題宋田子濟畫雁

五國城邊白草秋蒼茫良嶽夕陽愁帛書誰繫天邊雁空向
昇州憶汴州

沈啟元

一首

啟元字端伯六合人國子監生

永定寺

幽尋不憚遠蒲暮興還乘敗葉鳴蘿徑霜花落豆棚片雲閒
對客獨鶴懶依僧更有東林約今宵宿未能

陳仲漆

一首

仲溱字惟秦懷安人有陳惟秦詩

列朝詩集惟秦詩苦求工不愜意不止每出其詩示人以手按紙手顫口吟人或誦其詩口喃喃與相應其自喜如此

蘇小小墓

渺渺江天響暮潮西陵黃土葬妖嬈錢塘不是高唐路油壁青驄總寂寥

王崑仲一首

崑仲字玉生閩人禮部儒士

金陵懷古

栖霞高嶺翠煙凝立武湖光似鏡澄古渡遠迎蘭槳妓名山深閉瓦棺僧藻蘋歲歲功臣廟松檜葱葱太祖陵欲問六朝

何處所都人惟解說龍興

陳邦注 一首

邦注字平夫閩人有釣磯集

古意

郎住橫塘東妾住橫塘西相思不相見橫塘青草齊

康當世 一首

當世字孟擔莆田人

夏日睡起

山窗無處不藤蘿欲賦閒居奈嬾何不信昨宵春已去起看

池上落花多

姚貞 一首

貞字元亮上元人

別業

枳籬別業結山鄰
幾明窗絕點塵
檻竹報晴仍帶雨
瓶梅裹凍固留春
彈餘綠綺茶聲熟
臨就黃庭墨暈新
門外一溪通釣畧
半邀酒客半詩人

陳椿一首

椿字汝大閩人有景于樓集八卷

感秋

素月出東壁涼風吹我襟
中夜不能寐披軒彈鳴琴
物化有代謝隙駒無停陰
勛名在盛年卽事感何深
燕石旣混璞驪珠復淵沈
誰收爨下材一以微黃金

洪寬 一首

寬字仲章莆田人

露書洪仲章謂詩須弄韻畫須弄墨書須弄筆亦必能弄韻能弄畫能弄筆始臻佳境

夏日同徐茂吳臧晉叔錢叔達遊西湖分韻

丹嶂看疑畫平湖望若空層巒青靄外古剎白雲中水淨菰蒲綠林幽木槿紅風光已可樂況復故人同

何體性 一首

體性字其庵廣州順德人有朗吟軒稿

有所思

浮雲西北馳逝水東南去有客正傷離佳人在何處煙消江練闊湛湛青楓樹日暮渺愁予疏鐘度微雨

王同軌 一首

同軌字行父黃岡貢生除江甯知縣遷南太僕主簿

有蘭香集

列朝詩集行父嘗從吳明卿出遊與王弇州李雲杜善作詩不多自有風格不欲寄諸公籬下撰前後耳談纂述異同亦洪氏夷堅之流也

赤壁樓上同弟綏父陪劉維芳雨集

登樓披秀色尊酒暫從君檻集千峯雨窗流滿榻雲魚龍寒
自蟄鴻雁暮爲羣共醉空明上人問世界分

徐益孫 一首

益孫字孟孺松江華亭人國子監生

漱六齋集孟孺申楮握筆真兩京六朝之遺田按孟孺名列弇州四十子余從屠長卿由奉集見

孟孺序文具有六朝人風致徧檢諸集無有錄孟孺詩者後於松風餘韻獲詩一篇亟登之孟孺非惟擅文藻且有至行母卒結廬墓側作文誓墓不復應舉年未五十卒惜遺集不傳

春日登潮音閣

崇閣俯滄洲乘春獻歲遊鳴榔魚網集倚檻水雲流龍藏涵虛迴禪扉入定幽錫飛逢惠遠相對狎沙鷗

周如埧一首

如埧字所諧請田人

筆精所諧莆處士也足迹不出戶庭苦吟弗輟未嘗妄與顯者遊故其爲詩綽有林壑之致如風生極浦潮常白霜冷空林草變衰萬里寒山橫積雪半汀衰草隱斜陽百花潭上漁竿在五柳門前鶴徑荒因嫌城市非吾土卻傍漁家作比鄰牆壓花枝妨客過泥深苔徑喚人扶等句全無煙火食氣

田家吟

不識市朝車馬喧殘蓑簞笠老田園柴門去郭無多路野竹
臨流自一村春雨桑麻終歲足清時雖犬幾家存兒孫牧畜
南山下爲道須妨猛虎繁

梁士奇

一首

士奇平陰諸生有樂府雜詩

山行

蒼厓老樹長千尺挂著山精薜蘿衣紅葉黃花惜日晚溪風
山雨送人歸

林元協

一首

元協字子彥太平人

聞詔起遷謫諸臣

金雞飛詔下長安
逐客逢時又拜官
投杼固知人語誤
賜環眞見主恩寬
十年孤憤朱雲檻
一日清塵貢禹冠
獨倚高樓瞻魏闕
浮雲散盡露溥溥

毛子亭一首

子亭字懷士太平人

貧居

昨夜風吹茅屋破
衾寒被澀不得卧
朝來縮頸怕出門
道旁老狐見人怒
山南荳苗半枯死
抱甕欲汲溪無水
咽乾喉急暮來歸
小兒索食牽我衣

蔡鉦一首

鉦字邦奇太平人

歲暮粵歸

葛陽石上花不發歲晏他鄉歸去來妻子嗔予淹道路田園
今日長蒿萊不憐髣髴髮經時短只訴饑寒到骨哀喜有高松
夾窮巷柴門依舊對山開

鄔佐卿一首

佐卿字汝翼丹徒人有纓頭集十卷

筆精汝翼性豪爽喜遊俠邪著述甚富自文集外有
豔詞十卷題曰纓頭集皆生平贈妓之作佳句麗情
可歌可詠笛中舊恨留金谷天上新愁問玉卮江柳
眉梢雙鎖恨海棠春盡獨銷魂寶鏡夜寒鸞顧影
染春煖燕歸樓妝粉曉沾蝴蝶草嘖紅春染杜鵑枝
鬢梳蟬影分雙翼衣前靈綃學六銖小閣題情絨
蔻空庭微步出蓮花樓前彩鳳隨仙史陌上銀箏
使君春回漢水思捐佩月滿秦宮照捲衣玉樹輕
凝屈戌垂楊新月挂鞦韆楊柳調翻歌扇月柘枝香
度舞裙風明月小樓關盼盼垂楊深院李師師等聯

膾炙尤甚義山無題之後亦不多見也

宮詞

複道傳呼御輦過遙聞仙樂動雲和黃金縱買長門賦逝水終慚太液波

顧斗英 三首

斗英字仲韓上海人有小菴羅集六卷

筆精華亭莫延韓上洋顧仲韓皆奕奕才情盼倩辯麗網雲間二韓延韓文名滿天下仲韓詩僅有存人莫能名者仲韓少有雋才磊落不羈窮服饌娛聲色選伎徵歌座客常滿日費萬錢不憚每出輒載與俱畫舫旅棲盆升圖書古尊鼎彝具竟以此傾父貲鬱貧病以死余薄遊海上始知有顧仲韓而慕草宿矣詩多憐風月狎池苑大都流靡以自妍傷其才而不遇也

卧病感懷

較稀還復懶擬庾更多愁拙笑安蛇足癡真類虎頭捫胸開
五嶽搖筆吐千秋不解千人策文園豈倦遊

送僧入關

西竺初傳法東林復閉關齋心修白業投老寄青山彌勒分
龕坐閭黎乞食還自應無退轉玄論許誰攀

秦淮小姬

一片春山乍學描纏頭初試紫霞綃章臺無數青青柳最惹
東風是嫩條

袁敬烈二首

敬烈字無競閩人知府表子有卧雪齋集

邊上送故人

送君歸故國而我殢邊州日落鄉心遠
緩嘯關樹愁秋風沙磧馬夜月海西樓
羌笛數聲起那禁雙淚流

紅葉怨

宮水潺湲出御溝拭將殘淚寫新愁
誰言一葉傳情易載得愁多卻不流

王湛一首

湛字汝存閩縣歲貢生有王生詩

楊白花

楊花不戀枝飄蕩向南去願得迴颿生
吹花還故處

梁天佑一首

天佑字以德一字龍田浦城人

龍卧寺步葉進卿韻

龍卧精藍別有天，尋真到此亦清緣。
空山雲與客爭路，古寺鳥同僧話禪。
隔代題名滋碧蘚，逼人怪石聳青蓮。
老來擬此營精舍，愧乏前人布地錢。

沈翰卿一首

翰卿字子羽江陰人

明詩統子羽嘗游吳一時名士多與之遊詩名滿吳下

與石洲遊高座寺

檻前修竹弄晴暉，木杪層巒鳥道微。
並轡遠遊紅葉寺，入山頻扣白雲扉。
咄嗟世網吾將避，寂寞空門願所依。
一笑偶逢陶陸輩，遠公蓮社幸同歸。

明詩紀事

貴陽陳田輯

庚鑑

袁崇冕一首

崇冕號西野章邱布衣

池北偶談西野以布衣終工金元詞曲與李中麓唱酬

十月始見菊

怪爾清姿消瘦盡冷風疏雨亦淒其元冬乍見真成晚白首
相期亦未遲雲暗郡城愁獨坐日斜鄉國望移時樽前摘索
原因醉燭底歌吟轉更悲

王留七首

留字亦房吳人稱登子有匏葉燕載遺稿等集

列朝詩集亦房伯穀之少子也年十五游金陵作舊京篇父客皆歎異以爲文考復出伯穀沒後不得意於文戰肆力爲歌詩曲周劉敬仲南陽馬仲良最相矜重仲良之持論欲爲調人於李何袁鍾之間以才情風調自樹赤幟而獨深推亦房以爲狎主齊盟無兩子也仲良亦房相繼卒年皆未四十亦房之生也晚未能傳習其家學而又侵淫於時調橫從跌宕於先人之矩矱遂將偁而去之轉入惡道中矣

送費元明下第歸樵李

淪落雖然慣羈愁一倍新欲忘難遣事但較不歸人凍水藏河面乾沙擁樹身酒家經漸熟應笑往來頻

朱康侯王孫

南州王孫盛文藻用晦云亡鬱儀老如君繼起方少年五言清真尤覺好我父牛耳凌中原君家二老相推尊君今懷刺

復相訪直謂貧士非王孫告我經年作游計千里齋糧託孤
詣戒僕還須變姓名逢人豈復誇門第行裝羞澀氣瀟灑三
尺胡琴一羸馬但聞朋友便交歡每到山川卽描寫浪傳腰
玦青珊瑚布衣蕭然何所殊長揖那曾傲漁釣低頭不敢爭
屠沽我亦奇游不停轍袖裏懷書覲宮闕瓣香慷慨拜荆高
杯酒殷勤酌毛薛所思廬山未得從詩中想見香鑪峯君行
便欲躡之去同聽東林煙寺鐘

田按周櫟園書影云亦房畧有才情走入魔道余在
閩中見其詩刻種種無一語及其父百穀者詩文卽
不同調何致自昧人倫若是今錄亦房贈朱康侯詩
云我父牛耳凌中原君家二老相推尊可爲亦房一
解此誣矣

送劉其奇歸豫章約予

留滯空憐客計窮舟行未必與君同汀蘆正密喜新雁田草
將衰愁亂蟲獨夜有懷偏避月長年無力但需風遙知詩句
偶成處多在小村燈火中

送楊修齡侍御按黔時方用兵

疏雨濃雲暗遠郊南征慷慨誓前茅山根野火懸孤戍木末
人煙據險巢萬里鼓笳迎六傳兩階干羽待三苗應知日有
千言就記得歌名或是饒

初冬客懷二首

故園消息杳難憑寄食栖栖百慮增貧士驕人猶勝諂庸流
愛我不如憎殊方得病醫無力獨夜成眠醉始能身賤敢從
同學較任他裘馬自相矜

傍澗誅茅十畝宮主人閒卽住山中藥苗飽雨分畦綠楓葉
酣霜合鳴紅半夜樵歌寒趁日六時僧磬響因風如今徙倚
都門望凍草僵沙是處同

崑山訪王世周不遇

小築宛如江上村階前徑尺青苔痕偶然繫艇一相訪惟有
寒潮同到門

卜彞年 三首

彞年字孟碩吳江人僑寓嘉興諸生有綠曉齋詩集

靜志居詩話孟碩家盛澤幼赴嘉興童子試時安福
顏欲章知縣事亟賞其文拔置第一遂補諸生讀書
東塔寺尋游陳仲道之門負才傲世恆衣茜衣入市
題其門曰鄉人皆惡國士無雙惟與同里張汝培端
甫結契時相倡和孟碩旣失意坎壈不平仿屈平楚
辭作招招章假帝誥河伯之文有日東聯瀟波兮南

絡沅湘黑者錯白兮弱者問強災既淪於入坎兮害
 乃基於剝牀翹商羊之子舞兮又安覩儀鳳之踰蹕
 固帝心之欣禍兮亦今俗之好殃又聞杜松劉綰二
 將張師賦長謠千餘言以訴楊鍋平居好結客客至
 必留坐是奇窘或三日不爨終不乞米於人也詩尙
 崛奇問有合律者
 百城煙水孟碩負才任誕嘗爲詩云誅武等羣小放
 鶴得身遊謂檣李蔣之翹曰此生平得意句也客遊
 虎邱值大雪徑無人迹忽千人石上歌聲遏雲科頭
 挽雙髻一長鉞釘簪之身穿紅布直裰乃孟碩也雅
 好點染余友蔣洪吉述其當月明之夜往往兀坐樹
 下想像煙林遶曉不寐故其運筆磅礴淋漓髣髴有
 仙氣余曾見一單幅畫落月於叢樹藤蘿之中光芒
 四映對之爽氣拂襟信斯言之不謬也
 嬰餘叢話鄭諒伯新刻其鄉先輩卜孟碩綠曉齋詩
 集四卷見寄卜沒於萬厯時年僅三十二負才佚盪
 振奇好異不屑與俗同使老其才或能與文長次梗
 相上下耳五律句如沙昏秋雁落湖滿夜漁歸五湖
 新水發一棹故人來鶴鶴沐松露房廊穿竹風皆自
 然高勝

宿鸞湖

鶯湖日墮波餘紫青翰舟留白沙嘴半夜潮生枕簟間遙林
月到篷窗裏呼出漁郎張志和瓦盆白酒發高歌平明共爾
升元圃回首吳山青一螺

山家

水滿失灘沙雲開曳彩霞晴來閒晒藥雨後急收茶鶯坐一
身柳蜂歸兩股花人言無事得多事最山家

晨起湖上

紙窗清映盛湖曉窗裏宿雲溫欲飛湖鳥呼羣動高柳山鷄
唱闌開矮扉春濤十里牙樯細夜雨一圍蔬甲肥自信直鉤
長罷釣無魚不與素心違

邵潛

二首

潛字潛夫南通州人有邵山人集

池北偶談邵潛夫性傲僻不諧俗人多惡之所著友誼錄頗更傳諸書多可傳者年老無子客如皋城年八十餘矣予過訪之茅屋三間黝黑如漆邵筋骨如鐵白髮鬢鬢被領雙眸炯然與修禊昌氏洗鉢池尙能與予輩賦詩

田按潛夫家貧不善治生產既喪婦續娶里中小家子也庸奴其夫求去晚貧甚僅僅拾橡到薦以自給性卞急與人語稍牴牾輒謾罵嘗與鍾竟陵舟中面詆其密友譚元春又嘗過虞山謁錢宗伯稍待久之卽罵閤者而去博覽多通有潛夫別集嬰鳴錄循吏傳引年錄志幻錄余皆得見之詩五言有可錄者陳迦陵亟稱之不能副其言也

奉送周使君伯二

人生易超忽聚散良有時念與知己別氣結難爲詞神交義不薄出札恒見之願展嫵婉情千古與等期飄風從東來浮雲倏西馳奄然一相失悵悵使心悲貧士代失職懷瑾誰當

知感激平生意淚下空漣漣

月夜同王夢叟過水月閣訪周夢翁

庭空明積水坐久露華凝身寄誰非客心閒獨媿僧花間過
茗盃柳外出漁燈莫漫談風雅齊滕敢代興

陳元素一首

元素字古白長洲人諸生

無聲詩史古白以文學知名於時書法清勁類歐率
更寫墨蘭有楚畹清芬之致

何仲先移家維亭

周親於我更芳鄰徙宅超然遠市塵路出東門船似馬湖當
前浦浪如銀誰能父子相師友豈少賢豪互主賓潮到此亭
曾有識知君才不讓前人

趙宦光一首

宦光字凡夫吳人有寒山雜著

百城煙水寒山別樂在支硎山南萬厯間雲間高士
趙凡夫葬父舍元於此遂偕元配陸卿子家焉自關
邱壑鑿山琢石如洞天桃源前爲小宛堂茗椀几榻
超然塵表盤陀空空化城法螺諸庵皆其別墅也而
千尺雪尤爲諸景之最子靈均一傳後改精藍葛彌
光贈凡夫詩云松風二十里花店野棠村已是山深
處無嫌客到門廬中半生住海內一家言雨壑看飛
瀑蓂雲濺石根鄧雲霄贈詩云宦海嗟無岸名山別
有春遙從棲隱處再覓姓龐人野鳥時窺客幽花不
笑貧坐鄰支遁宅今古並芳塵焉時可同中少師飲
凡夫齋中云緬懷新築勝丹閣俯嶙峋間擊山中相
幽尋世外人瀑飛剡溪雪花發武陵春使欲移家住
於斯并采真吳夢陽凡夫邀宿山居云昏黑從君返
懸燈客入門房廊營石骨窗戶瀉波痕四壁白雲靜
中庭青草繁問余能領略搔首自忘言范滂贈凡夫
云無路覓君去亂峰雲若屯嵌空巢樹杪鑿沼露山
根畫遣兒摹勒詩從婦討論墓田何太近宿草接間
門林雲鳳春日趙家山詩云出郭不知遠入山轉覺

幽興樵爭嶺路隨鶴到林邱瀑水當門雨松陰滿地
秋人間正多事何日復來遊

柴門

編荆可當門疊石能爲牆青山露牆上野花牆下香

茅維二首

維字孝若歸安人副使坤子萬厯乙卯舉人授翰林

孔目有十資堂甲集五卷乙集十八卷菰園集六卷

佩觿園遊草一卷

屠隆南有堂集孝若爲漢魏則漢魏爲六朝則六朝
爲初唐則初唐其於體靡不合間爲唐之中盛雄雋
悲壯龍劈海而鵬搏空也

列朝詩集萬厯間著之稱詩者賦懋循晉叔吳稼登
翁晉吳夢陽允兆而孝若與之抗行爲四子有十資
堂集數十卷流覽篇帙才調斐然以檢括爲難耳嘗
以所作雜劇屬余序已而語人曰虞山輕我近舍湯
臨川而遠引關漢卿馬東籬是不欲以我代臨川也

其稟元如此
田按孝若古詩清真頗近宋人

友人寄餉芥茶

坐久碧窗下幽燈散林影
故人有芳訊特餉一函茗
山僮見採摘重趼歷巖頂
陽巖抽碧枝土瘦香倍猛
澤蘭沃其根氣韵幽以靜
量水手自煎槍旗沸若鼎
瀉之白玉磁乳花浮耿耿
乍傾色若無稍貯味逾迴
七椀清風颭一啜覺泮冷
何用金沙泉自陋建陽餅
世以方虎邱品置豈平等
不願封雲溪願得芥一頃
紫筍日作供水厄呼不醒
大笑毀茶論空傳竟陵井

試芥茶

夏雲鱗鱗花木薺曉坐北窗
繞花氣阿顏搗茶至芥巔
采焙

皆云親手製，裊露朝采山之陽。篝燈夜焙，不盈器，香味略有數種，殊活火新泉。請君試急量雪水，貯花瓷盞，置槍旗鼎邊，沸乍傾，縹碧殊氤氳，亂瀉荷珠盃中，墜舌本未辨清甘，迴鼻端但覺奇香，帶洞山廟後相等。夷小芥一罍尤絕異，問之老梗，抽紫芽，沙瘦崖高，眾皆棄阿顏叩頭服。主人請出諸茶盡品次大馮開之常嘆茶道嚴，玉川未解此中秘。古人品茶重花乳，細碾龍團如餅餌。今人品茶重色香，縹緲虛無第一義。松蘿如入法官廚，天池如過五都市。龍井顧渚差蘊藉，一再啜之少餘思。虎邱天然冰玉姿，藐姑仙人見者避。不如明月峽中，芥落落穆穆高韻士，隱囊揮麈支許倫。居然名理饒玄致，吳儂四月櫻筍熟，桑柘映空撲衣翠。草堂無事日讀書，自領

山童課茶事企脚呼點蟹眼湯蕙蘭九畹澆胸脾欲草茶志
無煩言庶惟澹者標其意

吳拭 四首

拭字去塵自號道道入休甯人有武夷集百粵紀遊

諸稿

藍圓山響閣讀書錄述道人翰墨各極精妙畫師米
顛而同有潔癖讀水殘山今如廣陵散矣
列朝詩集去塵居新安之上山宗族多富人去塵獨
好讀書鼓琴布衣芒鞋寥然自異輕財結客好遊名
山水從曹能始自楚之黔覽勝搜奇歸攜一編以誇
示里人里人爭目笑之倣易水法製墨遇通人文士
倒囊相贈富家翁購之輒大笑曰無以孔方兄辱吾
客卿也坐此益大困耳聾頭眩為悍婦所逐落魄遊
吳門遇亂死虞山舟中毛子晉為收葬之去塵有不
寐詩云莫怪故人消息斷誰教金盡見床頭視張謂
黃金不多之句尤為淒切也

晚步

步出斜陽盡微涼
竹林滿溪迴山影空
雲斷夕光遠引策散
行蹤隨心恣幽懶
日出夜遙遙疏鐘到孤館

清遠峽

雨過山氣清
兩馬望相峙
樹裏出鐘聲
煙澄滿江水
熠熠林光中
露重滴松子

訪戈莊樂不值

經時相過又成虛
數樹支門綠有餘
在野不知三代往
入城安可一朝居
道書挂向梧桐壁
破硯行懷薛荔裾
誰謂古人不可及
古人當恨不君如

小重陽日偕蘭如孟芳過訪毛子晉

秋葉風飄露有香
野籬花發小重陽
愁予酒力難通夜
喜子詩名已擅場
柳葉挂門搖夕照
池波隔檻射秋光
須知生有山僧共
歲暮心期不可忘

寇學海

四首

學海字巨源廣濟布衣有寇山人遺稿

陳文燭二酉堂集寇山人詩才雄格老尤長近體如
懷村居則溪雲侵座冷山雨入簾疏懷謙之有從來
詞賦人多忌莫怪江湖我獨醒送肖甫有帝自非熊
先得兆士雖屠狗亦銜恩人多誦之

二餘齋初成漫賦

卜居無定業小築似蝸廬
日夕散鄰牧水澄窺澗魚
落花入醉後種竹雨來初
未敢追前躅貧哉常晏如

長安秋日移居

羈懷不可道，秋至日堪哀。
問舍鄉仍遠，登樓賦懶裁。
黃金與交盡，白髮共年來。
多少飛揚意，寥寥落酒杯。

秋日

生事於今不可言，西風瑟瑟滿平原。
腰間七首明如雪，欲向何門說報恩。

冬夜懷人

畫角聲中更漏殘，病軀孤坐地爐寒。
可憐今夜霜天月，何處愁人馬上看。

沈承一首

承字君烈，太倉州人。諸生有卽山集六卷。

田按：君烈小有才名，然誦其得意句如鐘聲奪夢尾晨光抹澹額，亦當時公安派之下乘也。

過趙凡夫山居

橫抱山爲枕平邀樹作家春風吹客至踏破一欄花

張大復一首

大復字元長崑山人有梅花草堂集

田按元長崑山人物傳四庫總目稱其敘述雅潔又有梅花草堂筆談遺聞瑣事頗頗以傳

霽

閒看草木生如怒戲潑湯茗味政新從此韶光知幾許風風雨雨莫愁人

朱鷺二首

鷺初名家棟字白民吳人有青浮子綽號

靜志居詩話白民負奇嘗獨遊黃山遠尋嵩華所至畫竹以自給家居撰建文書法擬思進呈請復革除

紀年不果崇禎初騎驢入都上所作甘露頌不果歸
結茅於郡西華山蓮子峯下躬親井曰不願見貴人
年八十餘乃卒是時隱居者王在公芥菴趙宦光凡
夫稱吳下三高而敦古節者白民爲最文文肅特誌
其墓

題蓮子峰

登峰問蓮子古路出僧家石榻留雲供空池長佛花

答王芥菴

不是看梅客還爲一宿禪多君留好句相見妙高巔

李之茂一首

之茂潞安人見謝四溟詩話

元日過柏垓僧舍憶謝茂秦

索居無歲事騎馬入禪林勝地堪逃俗名香可淨心偶思靈

運句暫與惠休吟庭樹來山鳥當春多好音

齊萊名一首

萊名字朱草桐城人諸生有青莎館集

懊懷歌

憑欄夜候歡望歡歡不來安得如春風時時入歡懷

孫鼓一首

穀字子雙華容人

沅湘耆舊集子雙著述甚富嘗雜採舊文分為四部
名徵書一曰樊微輯秦漢以前逸書一曰綫微輯漢
晉間箋疏一曰樊微輯秦漢以前逸書一曰綫微輯漢
徵採尙書十一種春秋十一種易八種禮樂詩三種
論語四種孝經九種何圖十種洛書五種統謂之古
徵書又著唐紀七十卷以新舊唐書踏駁多其所指
摘皆當體例今均佚僅存刪微一種獨被徵書之名
凡三十六卷四庫目錄稱其書能使學者生千百

年後猶見東京以上之遺文以資考證其功良不可
沒朱氏經義考甚諱一門其所引據出微書者十之
八九則用力亦甚勤矣

讀史

出門生慷慨閉戶傷幽獨展轉閱良史聊用舒心曲豈知古
人書含茹多局促金張侈漢留王謝縻晉祿紛有獨行者嘿
嘿隱立樸文字或浪傳傳聞多實錄當日佚厥真後視曠誰
續所以繁華子赫奕誇人目稷離坐可期何論顏曾跖